

陶雲汀先生奏疏

奏疏卷四十四目錄

江督稿

安化陶澍

揀員請陞泗州知州摺子

伺備夫馬船隻供應兵差過境摺片

喫咭喇夷船復來嚴飭堵截情形摺片

桃南于工正河續挑分數摺子

驅逐夷船開行竝嚴飭防範摺子

覆奏會同體察現行票鹽情形摺子

泰海等屬被災各場請展口糧摺子

訪獲鹽梟飭辦情形摺片

四川赴臺官兵請由江西行走摺子

兵差過境摺片

官兵索擾毆斃人命截畱審辦摺子

覆奏嚴飭沿海文武防堵夷船摺片

會勘籌議改河情形摺子

揀員請陞直隸州知州摺子

安撫會稿

奏爲沿湖直隸州知州要缺懇

恩俯准揀員陞署以裨地方仰祈

聖鑒事竊照泗州直隸州知州王毓芳因承緝竊賊
拒捕一案四叅限滿部議降調所遺員缺係繁
疲難兼三沿湖要缺例應在外揀選調補該州
界連兩省地接河淮逼近洪湖地瘠事繁向爲
匪徒出沒之所且有堰圩及仁義禮三河工程
巡查防守均關緊要必得精明強幹結實可靠
之員方足以資治理

臣等與藩臬兩司於現任

直隸州知州內逐加遴選非員缺緊要卽人地
未宜而候補直隸州知州安省現又無人實無
合例堪以調補之員惟查有亳州知州舒夢齡
現年四十五歲湖南進士由翰林院庶吉士散
館引

見以知縣用選授安徽巢縣知縣調補鳳陽縣知縣
道光九年

大計保薦因辦理沫河工程告竣奏奉

諭旨以應陞之缺儘先陞用道光十一年七月引
見奉

旨舒夢齡准其卓異加一級仍註冊回任候陞欽此
陞補今職十二年三月十七日到任該員守潔
才明辦事穩練以之陞署泗州直隸州知州實
堪勝任惟歷俸未滿三年且調缺請陞與例稍
有未符但人地實在相需例得專摺

奏請據藩臬兩司會詳請

奏前來臣等往返札商意見相同合無仰懇

皇上天恩俯念員缺緊要准以亳州知州舒夢齡陞
署泗州直隸州知州實於沿湖地方大有裨益
如蒙

附錄卷之四
二
俞允另行給咨送部引

見恭候

欽定仍照例扣滿年限再請實授其任內一切因公處分遵例毋庸覈計奉議罰俸銀兩現飭按限完繳造冊詳咨所遺亳州知州員缺係兼三要缺容_臣等另行遴員請補謹會同江南河道總督_臣張井合詞恭摺具

奏伏乞

皇上聖鑒訓示謹

奏

道光十二年十一月十五日具

奏十二月十三日奉到

硃批另有旨欽此同日奉到十一月二十八日內閣
奉

上諭陶澍等奏揀員陞署沿湖直隸州知州要缺一
摺著照所請安徽泗州直隸州知州員缺准其以
舒夢齡陞署仍照例送部引見俟扣滿年限再請
實授該部知道欽此

伺備夫馬船隻供應兵差過境摺片

再臣等接准部咨欽奉

上諭臺灣嘉義縣匪徒滋事已降旨頒給瑚松額欽
差大臣關防哈朗阿授爲叅贊大臣並派侍衛巴
清德華山泰齊克唐阿凱隆阿再著揀派巴圖魯
侍衛章京等三十員一同馳驛所需車馬照例逐
站更替行走各督撫飭委地方官妥爲照料迅速
進行無得稍有遲誤等因欽此臣當卽飛行經由
各府州縣欽遵預備妥爲照料惟查

欽差北來黃河以北徐州府屬爲江南入境首站本

係陸路一切車馬自可照例預備臨時過行惟
渡黃後自淮安府屬之清河縣境起至蘇州府
屬之吳江震澤縣始入浙江省界中間經過揚
州鎮江常州等府所屬皆係水路既無車輛可
備亦無車道可行迨至渡江而南處處皆支河
汊港車輛更屬難通自應預備船隻由清江浦
順流而下現常北風司令河道間有冰凍已飭
預期敲鑿務使流通不令稍有遲誤除飭黃河
以南向無車輛各地方一體預備船隻照料支
應俾資安速外謹附片陳明伏乞

聖鑒謹

奏

道光十二年十一月十五日附片會

奏本年十二月十三日奉到

硃批妥速供應欽此

暎咭喇夷船復來嚴飭堵截情形摺片

再^臣等先後接據蘇松鎮關天培蘇松太道吳其泰等轉據外洋總巡署遊擊劉桂林稟稱十月二十八日蹤見佘山直東洋面有夷船一隻行駛前往查逐等情該鎮卽帶同署吳淞營叅將林明瑞趕往至高家嘴洋面見該夷船豎立三桅船面載有礮械桅上有旂一面寫天竺國商船字樣隨向查詢該夷船有能說華語之人據稱天竺國係暎咭喇屬國船戶名劉羅在船舵水八十名船內裝載呢羽等物并稱在直東

大洋見有江南遭風船隻經該夷救起水手十二名現要送交等語林明瑞見答話之人認係前次胡夏米船內之夷夥甲利卽問其因何復來又稱前船已經回南現又跟隨劉羅同來求通貿易等語並據該夷將難民徐勝何耿揚姚顯章張天貴施正方倪太和宋振貴姚大安倪和上藤大興徐五福徐效全共十二名用腳船送出訊明均係崇明縣人在周長發船上充當水手一共十三人因船隻遭風沉溺遇該夷搭救十二人尙有劉連一人見寧波船上救去各

難民供有住址現飭確查崇明縣有無周長發
商船出口交保分領查該夷甲利本在胡夏米
船上作夥之人且船係自北而來似卽係胡夏
米山奉天折回之船據云前船已回此另係劉
羅船隻殊不可信其所掛天竺國商船字樣亦
未必非藉此爲更換面目之計惟該夷因有搭
救難民之事仍懇求銷貨進口其情詞尙屬恭
順

臣等仰體

聖主柔遠之至意當飭蘇松鎮道等量加獎賞仍凱
切諭以

天朝定例止准在於廣東貿易俾令恪遵

功令迅速回帆第夷情狡詐野性難馴難保其不
籍端逗遛業已分飭沿海文武員弁於明白曉
諭之中一面整頓聲威妥爲防範不許沿海居
民私相交接使該夷無所希冀現據該道吳其
泰稟連日雨雪交加風色欠利一遇順風卽行
押送出境臣陶澍因遠在清江浦往返需時卽
由臣林則徐會同提臣等就近督飭妥辦除俟
押送交替再行具

奏外合先附片以

聞伏乞

聖鑒謹

奏

道光十二年十一月十五日具

奏十二月十三日奉到

硃批另有旨欽此十一月二十八日奉

上諭陶澍等奏稱十月二十八日余山直東洋面有
夷船一隻豎立三桅船面載有礮械桅上有旂一
面寫天竺國商船字樣該船有說華語之人據稱
天竺國係暎咭喇屬國船內裝載呢羽等物並稱

在直東大洋見有江南遭風船隻經該夷救起水手十二名現要送交等語并稱答話之人係前次胡夏米船內之夷夥甲利據云前船已回此另係劉羅船隻殊不可信該夷狡詐性成難保其不藉此爲更換面目之計且船係自北而來甫由奉天折回又駛至江蘇洋面誠恐其又攔入他省著奕顯琦善陶澍程祖洛鍾祥林則徐富呢揚阿魏元烺等分飭沿海文武員弁於夷船到境時立即驅逐不許令其停泊登岸將貨物與民人交易至該船所需水米尤不許沿海居民私行賣給接濟祇

須嚴密防堵斷不徃用礮轟擊及上船搜查貨物
以致滋生事端是爲切要該夷船一抵廣東著盧
坤朱桂楨中祥等諭以天朝制度只應在廣東交
易務須遵守定例不准私越各省卽飭該國大班
管束飭令迅速回國至該夷船用腳船送出難民
徐勝等十二名訊均係崇明縣人在周長發船上
充當水手尙有劉連一人見寧波船上救去著陶
澍林則徐確查崇明縣有無周長發商船出口之
事據實具奏將此各諭令知之欽此

桃南于工正河續挑分數摺子

總河會稿

奏爲桃南廳于家灣正河續挑分數壩工已得丈尺並現在趕辦情形恭摺奏祈

聖鑒事竊照桃南廳龍窩汎于家灣正河挑有二分餘工及壩工進占日期經臣等恭摺

奏報在案嗣於初三大雪竟日旋又西北大風晝夜不息天氣沮寒人夫僵縮自初四至初十日嚴冰凍結深入土底二尺有餘挑夫用鐵鎚礮石打凍起土萬分艱難屢車笆斗敲冰涸水尤爲不易經催工道廳督飭各分鼓勵夫車奮力

趕挑不任稍爲停待臣張井復挨分親勘見有
出土無多者當卽分別擥頂棍責仍責成駐工
道廳監視嚴催臣陶澍及

欽差尙書朱士彥侍郎敬徵各先後赴工上下查勘
不許絲毫偷減截至現今止各分續挑土方連
前已出之土合計共有五分工程日來風氣轉
東堅凍微解正可併力趕挑東西兩正壩各廂
寬八丈上水邊埽各廂寬四丈兩壩進占共得
四十四丈九尺緣兩壩先係退後數丈創槽廂
做又須迎向上水往外圍越是以仍存口門寬

一百八十丈挑壩廂寬六丈進占二十一丈六尺
覈計兩壩所存料物足敷現在進占之用第
此後進至深水需料較多並恐刷墊跟追尤須
儲備充足而正雜各料購自上游船運在途者
現因黃河冰凌凍阻未能到齊自應將已進占
埽普律加壓以期十分堅穩再行次第前進一
俟挑工將完料物全備屆時放手廂築一氣呵
成可免收窄壩門停待吃重惟望此後天氣晴
暖毫無耽延河壩各工年內當可蒧事至原估
河頭畱長九十餘丈放河時再行搶挑今河水

續落原畱九十餘丈上首又接生嫩灘九十餘丈應於頭分挑工以上接行估挑一百八丈寬深丈尺估與頭分挑工一律仍畱八十餘丈以備放河時再行搶挑其原築攔黃壩應卽啓除爭盡歸入現估挑工另於新估挑工上首築做攔黃壩一道現均分投趕辦不致遲悞所有于家灣挑河築壩做成分數丈尺相應恭摺具

奏伏乞

皇上聖鑒謹

奏

道光十二年十一月十九日會

奏十二月十二日奉到

硃批知道了欽此

驅逐夷船開行並嚴飭防範摺子

蘇撫會稿

奏爲夷船驅逐開行現飭舟師押赴浙洋並分別飭查防範緣由恭摺奏祈

聖鑒事竊

臣等前因暎咭喇國夷船復至江省洋面

當將督飭曉諭緣由附片具

奏在案

臣

林則徐先於接准提鎮咨會時卽委候

補知府善慶太湖協副將鮑起豹馳赴海口隨同鎮道並會同上海寶山兩縣酌賞該夷人猪羊酒食以獎其救護難民仍剴切曉諭不准違例銷貨並將難民徐勝等十二名收回訊取確

供交保分領回籍正在催令開行間欽奉

上諭據國祥等奏十月初二日在隍城島遙見西南海面有暎咭喇國夷船一隻行駛甚速著嚴飭沿海州縣及水師營弁管帶兵丁駕駛船隻於該夷船過境立即驅逐不許令其停泊登岸將貨物與民人交易致令滋生事端至米糧尤不許沿海居民私行賣給接濟等因欽此臣等恭錄欽遵復飭文武各員妥速驅逐並嚴禁沿海居民不許以米糧私賣接濟旋據稟覆海口行商舖戶因奉嚴諭公立議單同詣

天后神前焚香設誓悉皆凜遵法度概不與夷人
交易該夷人見貨物不能銷售且官兵稽察森
嚴卽糧食亦無從私買心生畏憚旋向營船聲
稱前在洋中搭救商船致將梢篷折損求賞木
板鐵釘趕緊修脩一俟雨雪稍止卽當開行等
語當經蘇松鎮關天培蘇松太道吳其泰酌賞
木板鐵釘催令趕修茲據稟報該夷船於十一
月十五日起旋挂帆乘風開行臣等責成該鎮
關天培督率將弁兵船押逐南行凜遵前奉

諭旨務令與浙省舟師明白交替不敢稍任含混竝

飛咨浙江撫臣提臣一體押逐回粵第夷情狡

獪或於押赴東南深水外洋之後料知師船不

能寄旋仍復繞越過北亦須預防一面咨會山

東撫臣分飭沿海縣營嚴行堵截以防竄越至

此次夷船內能懂華語之夷人甲利一名卽係

前次胡夏米船內夷夥臣等以胡夏米前船竄

往高麗之後尙未得實在下落今旣認有前次

夷夥且係自北而來則該船自卽係胡夏米之

船當經移行提鎮並飭府縣確切查覆旋據僉

稱此次夷船比胡夏米之船小至二丈有餘檣

桅亦少一道細加察認並非原船因卽詰詢甲利從何又來其胡夏米原船究往何處據甲利聲稱此次劉羅之船於七月十八日自天竺國開行原欲逕赴廣東因南風甚大吹到越南口岸適胡夏米之船到彼相遇胡夏米乘坐原船回去伊卽搬過劉羅船上從直東深水大洋乘風向北十月初間到關東蓋州洋面天寒冰凍不能停畱隨又乘風南行復至江南等語查該夷人一面之詞原難憑信卽使所言屬實其爲包攬指引已屬顯然此次因有救護難民希圖

藉通貿易今貨物仍不准銷諒可杜其妄念據稱十月初間在關東蓋州洋面似卽係隍城島所見之船被逐折回但旣非胡夏米原船則胡夏米究竟曾否回國尙未可知臣等現飭水師將弁押送至浙省明白交替之後仍須在洋時加瞭探倘復有夷船竄至立即堵截回南並飭沿海營縣隨時防範不得以此次夷船業已開行卽爲了事一面咨會廣東省查明胡夏米前船並此次劉羅之船果否回粵統飭該國大班管束外所有夷船業已押逐開行並飭查防範

緣由謹合詞恭摺具

奏伏乞

皇上聖鑒謹

奏

道光十二年十一月二十一日會

奏十二月二十日奉到

硃批另有旨欽此先於十二月初五日奉到

上諭陶澍等奏夷船驅逐開行現飭舟師押赴浙洋
並分別飭查防範一摺此次英咭喇夷船向營船
聲稱前在洋中搭救商船致將梢篷折損求賞木

板鐵釘修脗當經蘇松鎮總兵關天培等酌賞木板鐵釘已於十一月十五日起旋挂帆開行仍著該督等責成該鎮督率將弁兵船押逐南行務令與浙省舟師明白交替毋許含混竝著飛咨浙江省一體押逐回粵第夷情狡獪或於押赴東南深水外洋後仍復繞越過北竝著飛咨山東分飭沿海縣營嚴行堵截以防竄入再此次夷船比胡夏米船小至二丈有餘檣桅亦少一道據甲利稱胡夏米乘坐原船回去伊卽搬劉羅船上其爲包攬指引已屬顯然惟旣非胡夏米原船則胡夏米會

否回國尙未可定該督等仍飭水師將弁押送浙
省明白交替後在洋瞭探倘復有夷船竄至立即
堵截回南竝著沿海縣營隨時防範仍遵前旨不
許令其停泊登岸將貨物與民人交易至米糧尤
不許沿海居民私行賣給竝著咨會廣東查明胡
夏米及劉羅船果否回粵統飭該國大班管束將
此諭令知之欽此

覆奏會同體察現行票鹽情形摺子

欽差會稿

奏爲遵

旨會同體察票鹽情形據實覆

奏仰祈

聖鑒事竊臣陶澍先經接准軍機大臣字寄道光十

二年十月初五日奉

上諭據御史周彥奏票鹽之法與場竈起徵名異而
實同場竈起徵利於私而不利於商給票行鹽利
於梟而不利於國其可慮有三等語著穆彰阿陶
澍悉心體察將現在淮北鹽務情形及該御史摺

內所列各條詳加審度該御史旣言有三可慮又云利多害少卽移其法於淮南豈非自相矛盾現在試行尙未定局須通盤籌畫總期有利無弊不可以目前而忘久遠因鹽務而累及地方也該御史摺著鈔給閱看將此各諭令知之欽此竝鈔原摺前來臣陶澍正在會同穆彰阿籌議間臣敬徵臣陶澍復准軍機大臣字寄十月二十六日奉

上諭前據御史周彥條陳淮鹽票引一摺已有旨交穆彰阿陶澍覈議穆彰阿現已起程前往湖北著

敬徵會同陶澍體察情形詳覈議奏等因欽此臣
等伏查淮北鹽務實因道遠運艱商力疲滯向
藉淮南接濟嗣淮南亦疲敝萬狀欲籌調劑則
南商自顧不遑既苦重貲無措欲僉新商則舊
商疲敝可鑒誰肯舊轍相尋以致多年來淮北
引目塵封

國課懸宕竈鹽壅積口岸缺銷臣陶澍前於無可
措手之中籌議票引兼行之法以滯岸招販行
票在局納課買鹽領票直運赴岸較商運簡捷
不論貲本多寡皆可量力運行去來自便使人

樂於爭趨以暢岸仍畱商運設或票鹽行之無效仍可立時停止故

奏明試行亦曾百計籌畫初未敢冒昧定議也

臣

敬徵隨查臣陶澍原奏試行票鹽章程十條於一切巡防私販剔除弊端初皆慮及復面詢委員鄒錫淳試行以來利弊情形據稱遵照奏定章程督飭局員卡員掣驗稽查尙無影射夾帶等弊商販均安分守法亦無爭鬥滋事之案票載越境卽以私論商販各顧貲本似不肯違例越境受人挾制等語臣等詳閱御史周彥原摺

以爲票鹽與場竈起徵名異而實同尤利於梟
而不利於國列陳可慮者三層臣等悉心體察
通盤籌畫竊查票鹽係官爲設局民販在局納
課買鹽領票迥異於場竈起徵之散漫無稽而
納課買鹽然後領票於

國竝無不利縱使其人本係梟販而領運有課之
鹽卽屬齊民已非曩時興販無課之私可比似
別無利梟之處原奏以借官票運私鹽引少鹽
多雖設卡抽驗人衆不服稽查勢盛兵難約束
或受賄包庇且援饒州官店賣私爲證以爲一

可慮查饒州與浙鹽引地接壤其官鹽子店影射所賣係侵灌之浙私與票鹽情形不同今淮北民販請票運鹽俱挨號次序而行到卡抽驗加戳人雖衆而各顧貲本故無不服稽查不遵約束之事沿路官弁兵役巡查彈壓匪徒歛跡竝不敢有滋擾如慮其引少鹽多及兵役賄庇要知查察不嚴商運且有夾帶緝私卡巡亦不免賄縱近經逐一查訪嚴叅漸知懾惕票鹽一隅之地尤非商運數省可比有犯必懲不稍鬆懈似尙可無慮也原奏又以試行滯岸兩三月

內能銷及一年之鹽而鹽非可多食若非侵及
暢岸暨淮南引地必不能如此之多場稅收課
偶增引地被佔轉廣票鹽增銀有限引鹽負課
更多爲二可慮查北鹽出場須俟六七月間雙
金閘啟放趁水趕運冬春例應閉閘故本年七
月以後商販請運逾額實趁水趕運並非數月
內口岸已銷一綱之鹽且引額久定生齒日繁
淮北多年來商疲運絀以致私充岸滯今票鹽
成本輕減得價卽售故銷數較多而民販納稅
請票時均經三場大使於票內填註姓名籍貫

運鹽引地往銷州縣其未改票鹽口岸不准請
運是暢岸既未侵及距淮南之引地更遠至稅
課雖屬無多總較勝於頻年引課全懸似亦尙
可無慮也原奏又以匪徒佔立馬頭一旦藩籬
旣撤甲所售地無許乙侵乙所行銷不容丙入
械鬥紛爭滯銷之地商仍裹足不前無從禁止
爲三可慮查行票各岸俱聽民販請運竝不能
甲乙分佔各銷各鹽無所鬥爭數月以來皖豫
各岸竝未聞有爭佔馬頭鬥毆滋事之案雖請
運之民販間有昔日販私之輩然已一一稟遵

法度且細加察訪衣冠商賈之流十居七八自
愛者既多不肖者亦步趨收歛所有極遠滯岸
始則不免觀望均經委員領票運往爲之倡導
民販望風附從似皆尙無可慮也凡此三者在
該御史深謀遠慮原屬周詳若以目前辦理情
形而論均已先經籌及不至有此等弊端至原
奏所稱之黃玉林一節查現在票販之中並無
此等著名梟匪招徠之販祇令納課運鹽原不
禁其呼朋引類請票來而運鹽去並不聚集一
方實於地方無害也該御史又以如果利多害

少請移其法於淮南誠如

聖諭自相矛盾蓋未悉淮綱情形淮南淮北大小懸殊淮北每綱錢糧三十餘萬雖比諸川陝等數省之鹽課爲多而淮南正雜各款歲須七八百萬全賴湖廣江西兩口岸而地遠額重較淮北多至數十倍難以輕爲嘗試且票鹽試行於淮北滯岸其運道須待雙金閘放開又須渡黃河而涉洪澤湖抵正陽關之後分赴各岸尙須盤駁故可以不虞泛濫淮南之鹽則江海四達無可範圍且淮北引地僅在皖豫一角淮南之楚

西等省居各省之腹中在在鄰界接壤如亦改行票鹽勢必四侵鄰境於各省之鹽法亦多窒礙總之票鹽之行原出於萬不得已之計總在場局各員及地方文武遵奉章程實力巡查庶可期於有利無弊今自試辦以來實不至無益於公亦不至利歸於梟設將來察有弊端及現行章程有應變通者臣陶澍自當隨時據實奏明另籌辦理務使課項日充商民俱便斷不敢以目前而忘久遠因鹽務而累及地方所有現行票鹽情形遵

旨會同體察據實恭摺具

奏伏乞

皇上聖鑒謹

奏

道光十二年十一月二十七日會

奏十二月十三日准 欽差咨十二月初九日奉
硃批知道了仍照原議盡心妥辦該部知道欽此

泰海等屬被災各場請展口糧摺子

奏爲查明兩淮泰海所屬被災各場來春懇請分別接濟仰祈

聖鑒事竊承准軍機大臣字寄道光十二年十月初三日奉

上諭本年江蘇上元等縣歉收桃源縣被水已加恩分別撫卹蠲緩散放口糧諒可不致失所惟念來春青黃不接民力不免拮据著體察情形如有應行接濟之處卽查明據實覆奏務於封印前奏到候朕新正降旨加恩等因欽此由撫臣林則徐恭

錄咨會欽遵臣查江蘇有災各州縣已蒙

恩旨撫賑兼施復荷

垂詢來春應否接濟仰見我

皇上厯念災黎有加無已伏查兩淮各場同被偏災
經臣奏准分別賑緩其來春應否接濟自應一體
查辦以副

聖主春膏普被之至意當卽恭錄轉行運司查詳去
後茲據署兩淮鹽運使俞德淵詳稱查得泰州
分司所屬之富安安豐梁垛東臺何垛丁溪草
堰劉莊伍祐新興廟灣等十一場均屬勘不成

災業蒙

恩旨緩徵惟現在積水漸退二麥尙難播種鹽花未能難煎竈力不免拮据來春青黃不接援照道光元年辦過按埧給穀成案分別每大埧給穀二石小埧給穀一石以卹竈艱又海州分司所屬之板浦中正臨興三場被災七分六分業蒙恩旨分別給賑惟池蕩積水尙未消退鹽花晒掃維艱且該三場係積歉之區連被災傷元氣未復竈情甚爲困苦來春青黃不接應請將被災七分及六分各竈無分極次分別展賑一月竝給

予一月口糧以紓竈力等情詳請具

奏前來臣詳加查覈均屬實在情形所有泰州分司所屬之富安等十一場來春按照大小埭面分別撥給穀石每穀一石折銀一兩折色散放所需銀兩在於上年商捐穀價餘剩款內照數動支毋庸開銷正款其海州分司所屬之板浦中正臨興三場仰懇

皇上天恩俯准成災七分者無分極次貧竈來春概行展賑一月成災六分者亦無分極次均給予一月口糧均以折色散放動用鹽課銀兩俾濱

海災黎咸資接濟感沐

皇仁無既除飭運司查明接濟戶口應用銀數另行
咨部查覈外臣謹會同江蘇巡撫臣林則徐合
詞恭摺具

奏伏乞

皇上聖鑒謹

奏

道光十二年十二月初三日會

奏十二月二十九日奉到

硃批候旨行欽此道光十三年正月初六日內閣奉

上諭上年兩淮被災各場前經降旨分別賑緩小民
自可無虞失所惟念今春青黃不接之時積歉災
區元氣未復著加恩將泰州分司所屬之富安安
豐梁垛東臺何垛丁溪草堰劉莊伍祐新興廟灣
等十一場均按照大小埤面分別撥給穀石每穀
一石折銀一兩折色散放所需銀兩准其在上年
商捐穀價餘剩款內照數動支毋庸開銷正款其
海州分司所屬之板浦中正臨興三場成災七分
者無分極次貧竈概行展賑一月成災六分者亦
無分極次均給予一月口糧卽動用鹽課銀兩折

色散放該督卽刊刻謄黃遍行曉諭務使濱海災
黎咸資接濟用示朕履端布澤普錫春祺之至意
該部卽遵諭行欽此

訪獲鹽梟飭辦情形摺片

再兩淮鹽務本年自入秋以後漸有起色良以糧私查緝淨盡梟販亦陸續擒拏所致但當事有轉機緝捕尤宜嚴密使梟徒無從竊發庶淮鹺可復舊規迭經臣分飭沿江營汛併力緝私不任一刻鬆勁茲據京口協副將田松林稟稱十一月二十二日訪有要犯王有道潛回沙頭地方勾聚回僑興販私鹽搶賣婦女情事當卽督率右營遊擊糜延慶署守備劉長清帶同弁委兵丁會遇瓜洲三江營兩處備弁兵丁並候

補運判趙祖玉家丁江都縣快役分坐船隻於是日黃昏時分齊抵沙頭密督地保將王有道草房圍住守備劉長清卽首先打門進內挈獲王有道王有王大年三犯復據地保回稱離此半里有許寡婦亦窩倭匪隨又督率往挈見許寡婦家房屋已空僅有一人向前奔跑登時追獲訊名張天林因知王有道被挈趕往許寡婦家通信之人其時天色已明見有六人手執器械在前行走復又跟踪追捕該犯等胆敢轉身拒捕經外委趙寶和奮勇上前挈獲散雲彪散

金彪散文彪楊大仁散春揚散萬全六犯仍復
一路窮追至四接跳地方額外李清泰及劉雙
李大鈞追獲王寬張明馬全福王路散永長李
天方趙得楊宗林均訊係王有道之夥不諱又
於江邊見有划船吃水沉重上船查看藏有幼
婦五口當獲僑犯一名散占魁船戶黃文本黃
文松二名訊據婦女等俱供被僑匪搶來等語
呈請發司審辦前來臣查僑匪王有道積慣販
私係訪聞飭拿之逃犯胆敢故智復萌潛回興
販搶奪婦女必應從嚴懲辦以靖梟風而安閭

間除劄飭運司會同臬司督飭審辦外所有獲
犯緣由理合附片陳明伏乞

聖鑒謹

奏

道光十二年十二月初三日附片具

奏十二月二十九日奉到

硃批覽奏鹽務漸有起色朕心稍慰然尤當倍加
勉慎勿半塗而廢糧私梟販緝拏甚屬認真亦應
不遺餘力方可奏功也勉之欽此

四川赴臺官兵請由江西行走摺子

奏爲四川省派赴臺灣征勦兵丁請照成案由江西省行走以資迅速由驛具

奏仰祈

聖鑒事竊

臣

接准四川督

臣

鄂山咨欽奉

上諭福建臺灣府嘉義縣地方匪徒滋事現派瑚松額等前往勦辦著鄂山於四川兵丁內挑選壹千伍百名揀派得力將弁管帶迅速起程等因欽此當卽派撥兵丁交游擊馬彥超等分起啓程聲明從前調赴閩省官兵係由水路行走此次自

應仿照辦理惟應由何處行走較爲便捷之處
川省未能深悉應由楚省核定移知江西安徽
江蘇浙江經過省分遵照應付等因准此 臣查
乾隆五十二年因勦辦林逆調撥四川屯練降
番赴臺原奉

諭旨在於湖北江南浙江行走經前浙江撫 臣 琅玕請
改由長江入江西之九江等府至浙江之江山
縣入閩省之浦城縣不必再走安徽江蘇計程
較近一千二百餘里奏蒙

俞允又經前江西撫 臣 何裕城請改由九江南康南昌

饒州等府屬至廣信府之河口鎮入閩不必再走浙江更可少走五百六十餘里且又少過一嶺亦奏蒙

俞允又嘉慶十一年三月因勦辦蔡逆欽奉

上諭溫承惠奏籌定四川屯練兵丁行走道路一摺此次赴臺勦逆川兵改由江西九江府起旱抵沙井登舟由內河之廣信府鉛山縣河口鎮起旱直入閩省崇安縣境所有水陸一切供頓文應預爲備辦迅速前進等因欽此是乾隆嘉慶年間赴臺之四川官兵均由江西行走較之繞道安徽江蘇浙江計少

程途一千七百餘里此次自應循照成案辦理
俾兵丁早到一日卽可早收一日勦捕之功於
軍營大有裨益臣因查有舊案卽不揣冒昧飛
咨湖北江西福建各督撫預期備辦夫馬船隻
俟官兵到境卽分別水陸隨時應付以利進行
仰副

聖主軍行迅速之意謹恭摺由驛具

奏伏乞

皇上聖鑒謹

奏

兵差過境摺片

再查

欽差大臣瑚松額叅贊哈朗阿赴閩征勦帶同侍衛
四員巴圖魯等三十員於十一月二十一日由
山東入江南宿遷境二十八日已分起全抵清
江浦登舟南下惟沿河多已冰凍經臣分飭各
廳營州縣敲凌前進行走均屬妥速現在河南
兵一千名由安徽宿州至江蘇江浦縣境接後
卽係陝西馬隊三百餘名應由上江句容境至
丹陽縣登舟其馬匹仍應由河岸驛路行走兵

丁及軍裝器械等件由舟運送至浙境交替臣
已分飭水陸預備齊全現在清江桃源各工將
次辦就尚書臣朱士彥改河之摺亦經臣與臣
敬徵張井履勘會議另奏其它堤一案因首犯
竄匿山東各境迭經派委員弁丁役分路密捕
并委徐州道李國瑞等隨同司員將現獲全案
人犯確切研訊臣與朱士彥敬徵復加細核俱
以爲案已審定卽可由臣朱士彥等會摺具

奏臣因兵差絡繹經過江南屬境亟須彈壓催飭
遄行卽於拜摺後回省料理各務合併附片陳

明伏乞

聖鑒謹

奏

道光十二年十二月初四日由驛具

奏本月二十日奉到

硃批另有旨欽此同日承准

軍機大臣字寄兩江總督陶澍道光十二年十
二月十二日奉

上諭據陶澍奏四川省派赴臺灣征勦兵丁請照成
案由江西行走一摺查乾隆嘉慶年間調赴臺灣

之四川官兵均由江西行走較之繞道安徽江蘇
浙江計少程途一千七百餘里此次自應循照成
案辦理現經該督飛咨湖北江西福建各督撫預
備夫馬船隻俟官兵到境卽分別水陸隨時應付
毋誤軍行竝著飛催各帶兵將弁趕緊兼程前進
不准稍有延緩又片奏陝西馬隊三百餘名應由
上江句容境至丹陽縣登舟其馬匹應由河岸驛
路行走兵丁及軍裝器械等件由舟運送至浙江
交替已分飭水陸預備齊全等語昨據楊國楨奏
稱接准西安副都統明禪咨稱赴閩兵丁三百名

自帶營馬三百匹惟西口馬匹向慣馳驟平原南
省石路岐嶇遠道必致疲瘦進征時仍需另換而
中途徒滋累贅已將交來馬三百匹委員解回西
安滿洲營查收至馬匹一項仍由閩省預備該督
卽飛咨前途毋庸預備裝載馬匹船隻將此諭令
知之欽此

官兵索擾毆斃人命截畱審辦摺子

奏爲出征備弁兵丁在途索擾毆斃人命由驛馳奏仰祈

聖鑒事竊

臣疊准河南撫

臣楊國楨咨奉

旨挑選兵丁一千名派總兵謝金章副將徐廷彪管帶前進接續分作八起行走等因當經查明此項官兵應由安徽宿州入境至江蘇省江浦縣渡江由上元江寧句容至丹陽登舟比卽飛飭經過州縣作速預備車馬照例支應不任稍有貽誤在案旋據安徽署宿州候補通判李承恩

陸續稟報自十一月十九日起至二十七日止
共經過河南省七起官兵該署州應付無悞官
兵等亦行走安靜僅第八起一起尚未經過茲
於十二月初三日接李承恩稟十一月二十八
日河北左營守備馬鳳右營守備尹殿英帶領
河南第八起兵丁二百四十四名至該州東門
外睢陽驛住宿一切公館車馬飯食等項俱已
週備忽有兵丁持把總拜鵬名帖至州署稱馬
守備與拜把總均係回教須送給每人折席錢
十千程費銀二十兩該署州恐拂其意送給馬

鳳銀六兩錢二千拜鵬銀四兩錢一千四百文
延至二十九日巳刻尚不起身各兵亦紛紛進
城該署州慮其滋擾卽會同護宿州營遊擊李
衡年往向馬鳳催促起身馬鳳不管拜鵬不肯
會面尹殿英則稱實係左營航延迨該署州回
轉馬號拜鵬又遣兵回帖該署州當將名帖交
家人胡林持往催令起身該兵丁等卽將胡林
扭去公館毆打家人楊忠差役李萬徐乾陳沅
勸阻均被毆傷馬鳳拜鵬先則置若罔聞後見
丁役楊忠等均已毆受傷胡林更受傷沉重

始行帶兵而去詎胡林旋卽因傷身死該署州
因兵行迅速礙難追截稟請札飭前途令馬鳳
交出下手正兇兵丁解回審辦等情臣查出師
兵丁在途行走該管官必應嚴加約束安靜經
行乃該守備馬鳳把總拜鵬藉以回教需索銀
錢復以不遂其數任聽兵丁將宿州丁役毆打
以致一死四傷又不將傷人兵丁交出殊屬瞻
玩現在兵差絡繹經過江南地境此風斷不可
長相應請

旨將馬鳳拜鵬革職審辦臣已一面照會河北鎮總

兵謝金章將馬鳳等所管第八起兵丁另派將
備帶領卽飭馬鳳拜鵬將行兇兵丁交出連馬
鳳拜鵬無論行至何處地方卽交何處地方官
解赴江寧聽候飭發歸案審辦其署州李承恩
是否因被索應付銀錢應俟審明時辦理宿州
地方離安徽省城比清江浦更遠臣已飛咨撫
臣鄧廷楨現當陝西馬隊兵將次過境一體嚴
飭沿途照例應付妥爲彈壓前進毋許藉延滋
事所有官兵索擾毆斃人命截畱辦理緣由理
合恭摺馳

奏伏乞

皇上聖鑒訓示謹

奏

道光十二年十二月初四日具

奏十二月二十日奉到

硃批另有旨欽此同日奉到道光十二年十二月十二日內閣奉

上諭陶澍奏出征備弁兵丁在途索擾毆斃人命一摺出征兵丁在途行走該管官理應嚴加約束安靜趲程此次河南第八起官兵行至安徽宿州睢

陽驛延不起身河北左營守備馬鳳把總拜鵬藉稱回教需索銀錢復以不遂其數任聽兵丁將該署州家人胡林等差役李萬等肆毆被傷胡林旋即身死又不將傷人兵丁交出殊屬膽玩此風斷不可長必應嚴辦示懲着河北鎮總兵謝金章將馬鳳等所管第八起兵丁另派將備帶領守備馬鳳把總拜鵬均着革職無論行抵何處卽行扣留竝勒令交出行凶兵丁一併交該地方官解赴江寧交陶澍嚴行審辦按律治罪竝飭沿途州縣於後起官兵過境妥爲彈壓毋許滋擾如再有勒索

情弊卽行奏叅嚴辦决不寬貸欽此

覆奏嚴飭沿海文武防堵夷船摺片

正拜摺間接奉

廷寄十二年十一月二十八日欽奉

諭旨以

臣與撫臣

前奏十月二十八日祭山洋面所

見天竺國夷船內有答話之人卽係前次胡夏
米船內之夷夥甲利該夷狡詐性成誠恐其有
攔入他省

勅臣等分飭沿海文武員弁於夷船到境立卽驅逐
不許停泊登岸與民人交易所需水米尤不許沿
海居民私行賣給接濟祇須嚴密防堵斷不徇用

國朝文獻通考卷之四十四
三
礮轟擊及上船搜查貨物以致滋生事端至該夷
船用腳船送出難民徐勝等十二名訊均係崇明
縣人在周長發船上充當水手尙有劉連一人見
寧波船上救去着陶澍林則徐確查崇明縣有無
周長發商船出口之事據實具奏等因欽此伏查
前項夷船業于十一月十五日押逐出洋南駛
經臣等會摺具

奏在案彼時詰詢該夷甲利據稱天竺係喫咭喇
所屬此次劉羅船隻于七月內自天竺開行因
風吹到越南適值胡夏米乘船回去伊卽搬過

劉羅船上乘風到關東蓋州洋面隨又乘風至
江南等語併查該船比前次胡夏米之船較小
檣桅亦少一道竝非原船惟該夷夙稱狡詐既
藉搭救內地難民爲由懇求貿易難保其不藉
端逗遛滋事經臣等賞給酒肉以獎其勞一面
申嚴禁令毋許私行交接盜賣米糧竝據海口
各商行議約不與夷人交易該夷船因無可希
冀又見海洋兵弁晝夜巡邏幟械鮮明竝未用
礮轟擊上船搜查而夷情已知震懾兼以風寒
雪重夷船間有凍斃求賞木板鉄釘修理梢蓬

起旋而去其船戶周長發等前於夷船送回時
卽經飭縣傳齊派委候補知府善慶等訊明均
係崇明縣人周長發置有沙船交耆舵何耿揚
管駕徐勝係船上舵工連水手共十三人於九
月十一日由吳淞口掛號出口到山東洋河地
方裝載豆石二十三日夜間行至佘山東南遇
風船漏將沉齊赴腳船上躲住有寧波船經過
救起劉連一人其餘十二人經外夷船過搭救
下船坐歇不容窺探船上約有七八十人兩邊
有礮何耿揚頗能識字寫出鄉貫該夷遂載送

赴淞在船時因言語不通故未交談等供該道府等查明竝無他故俱已交保發還各安生業至海洋風汛不時夷船猝至事所常有必須刻申防範現在臺匪不靖一水可通尤應預防逃竄倍加嚴緊仰副

聖主慎重海防之至意謹會同巡撫臣林則徐附摺
覆

奏伏乞

皇上聖鑒謹

奏

道光十二年十二月初四日具

奏本月三十日奉到

硃批知道了欽此

會勘籌議改河情形摺子

欽差總河會稿

奏爲遵

旨會勘江境改河情形悉心籌議恭摺覆

奏仰祈

聖鑒事竊

臣

陶澍

臣

張井先經接准軍機大臣字寄

道光十二年閏九月二十八日奉

上諭朱士彥另片奏本年二月入都途遇嚴烺言及
現在惟有將黃河改於北岸自桃源以下以北堤
爲南堤另築北堤其現在清口以下令讓淮水洗
刷於安東地方會黃由舊河身入海另於北岸開

運河數十里約需費二百萬可免倒塘灌放等語
改河數十里非旦夕可辦且新築北堤事體重大
經費亦復不貲是否可以籌辦之處著穆彰阿等
履勘形勢詳查利弊悉心妥議具奏欽此 臣敬徵
於本年十月二十九日在于家灣工次接准軍
機大臣字寄十月二十三日奉

上諭改河一事前旨交穆彰阿會同陶澍張井查辦
現在穆彰阿啓程後著敬徵會同陶澍張井履勘
形勢詳察利病悉心妥議具奏將此諭令知之欽
此當卽恭錄分咨一體欽遵隨經穆彰阿將朱

士彥原奏摺片三件移咨前來臣張井復將本年春間前河臣嚴烺路過清江面交臣擬改黃河運河圖式一件與臣敬徵臣陶澍閱看臣等查朱士彥片奏內稱改清口之議擬改至下游安東縣城以上蕭工地方較現今清黃交匯之處約下去五十餘里則黃水建瓴之勢約低五六尺洪湖之水少蓄五六尺可以暢出刷黃毋庸倒塘矣應於黃河北岸之桃源清河交界處相度地勢築新北堤一道下至安東縣而止計工一萬八千丈築堤高三丈寬三丈共計新堤

二百萬兩安東縣上新北堤之北挑新北運河一道運河之北再築新運河堤上至現在運河之豆瓣集止約估需銀六十萬兩以現在黃河北堤作爲黃河南堤以舊黃河高家灣以下至安東以上止作爲清水尾間重空軍船仍出三閘三壩靠堤下放在安東以上渡黃由新運河上行至豆瓣集歸運河約現行之路軍船計多七八十里添做柴壩以及刷堤放河等費約需三十萬兩舊北堤至新北堤約寬二十里並無城廂鎮市不過數十村莊給價遷移約需銀

二十萬兩等語前河

臣

嚴烺圖內係自桃北適

中之顧工起改河斜穿遙堤跨過中河鹽河下

達山安廳蕭工之北復穿入遙堤挽歸蕭工正

河

臣

等於十一月三十日會同前赴桃源北岸

按圖履勘覈對原議併帶同司員熟諳工程之

將備等悉心籌議逐處相度丈量由中河以至

山安廳界統計顧工至蕭工就遙堤北岸緝量

共長二萬四千餘丈原議只估戢築黃河新北

堤並未估計挑河查遙堤以北至擬築新北堤

寬處須六七百丈窄處須四五百丈若不挑有

引渠導河東注則百餘里平陸之地溜行散漫
必致普律受淤兼恐南衝北折兩面新舊堤工
均難保守自應酌爲估挑以期順軌茲量顧工
以北地勢過長若以孫工作爲河頭計少十八
里尙可節省應挑新河計長一萬九千九百餘
丈深八尺口寬二十五丈底寬二十一丈八尺
自桃北包家民房起至蕭工止須築新北堤一
道長二萬三千丈高三丈頂寬三丈底寬十八
丈再於新北堤之北自中河廳十里堡起至山
安廳蕭工止須挑新中河一道長二萬二千五

百九十丈口寬二十丈底寬十六丈深一丈新
中河之南北應築緯堤各一道北長二萬四千
五百九十丈南長二萬三千三百九十丈頂寬
一丈五尺底寬十四丈高二丈五尺以上挑河
築堤方價不一按例覈算與原議三百萬兩之
數幾至倍增又遙堤之內本有鹽河一道爲淮
北引鹽及葦蕩左營柴船經行要道今旣爲新
河跨壓雙金閘亦廢必得於新運河北堤以北
仍挑新鹽河一道自洪家蕩對過起至陶家馬
頭接入舊鹽河止長四千五百丈口寬十二丈

底寬八丈深一丈又須築鹽河北堤一道長五千一百丈頂寬一丈底寬六丈高一丈再於新中河北堤另建雙孔石閘以通鹽河此三項又需銀四十萬兩左右其遷移百姓村舍墳墓賞卹尙不在前數之內是改河之議卽事屬可行誠如

聖諭經費亦復不貲非旦夕可辦且查南河中滿之處上自桃南北起下至海安阜上汛止計三百餘里蕭工地界其中現在湖水暢出蕭工以上及安阜下汛積淤之處雖漸刷深而山安海防

至安阜上汎未能一律深通即使新改黃河可
於蕭工歸入正河而由蕭工以至安阜一百五
六十里仍不免中滿之患况擬改河頭之孫工
水面較遙堤以北內地計高一丈一尺除中流
水深一丈河底計高內地一尺新河挑深八尺
則舊河底實高新河底九尺其勢尙屬建瓴至
河尾蕭工挽歸正河之處現在水面高內地一
丈二尺五寸除中流水深一丈計河底高內地
二尺五寸新河挑深八尺則舊河底反高新河
底一丈五寸水性就下驟遇高仰則勢難強越

必致兩岸皆成倒灌河身依舊淤高引清至此
仍難暢出刷滌又中河廳遙堤北首查有積水
一段東西長八里南北寬十五里深二三四尺
不等無可宣放勢難施工舊減壩之北張家河
頭東西因減壩屢次啟放地勢淤墊約二十餘
里較現擬改之河頭河尾高至八九尺挑河至
此又多梗阻滋費此又嚴烺未經目觀者誠恐
舉之未幾廢卽隨之於漕運大有關礙所有改
河原議臣等再四籌商實無把握應請毋庸置
議謹將會同勘議實在情形據實恭摺具

奏伏乞

皇上聖鑒謹

奏

道光十二年十二月十九日具

奏十三年正月初二日奉到

硃批知道了欽此